


25
ՄԱՅԻՍԻ
2020

COVID-19

Luys Lnyu®



ՆՈՐ
ԿՈՐՈՆԱՎԻՐՈՒՍՈՎ
(COVID-19) ԴԱՅՄԱՆԱՎՈՐՎԱԾ
ՄԻՋՈՑԱՌՈՒՄՆԵՐԸ
ԱՐԴԱՐԱԴԱՏՈՒԹՅԱՆ ՈԼՈՐՏՈՒՄ.
ՄԻՋԱԶԳԱՅԻՆ ՓՈՐՁՆ ՈՒ ՀԱՅԱՍՏԱՆԸ

ՆՈՐ ԿՈՐՈՆԱՎԻՐՈՒՍՈՎ (COVID-19) ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԸ ԱՐԴԱՐԱԴԱՏՈՒԹՅԱՆ ՈԼՈՐՏՈՒՄ. ՄԻՋԱԶԳԱՅԻՆ ՓՈՐՁՆ ՈՒ ՀԱՅԱՍՏԱՆԸ



ԲՈՎԱՆԴԱԿՈՒԹՅՈՒՆ

1. ՆԵՐԱԾՈՒԹՅՈՒՆ	1
2. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԸ ՏԱՐԲԵՐ ԵՐԿՐՆԵՐՈՒՄ	1
2.1. Քաղաքացիական իրավունք և դատավարություն	1
ա. Դատարանների գործունեության կազմակերպում	1
բ. Թվային գործիքների կիրառում	3
գ. Քաղաքացիաիրավական և դատավարական ժամկետներ	4
դ. Դատական ակտերի հարկադիր կատարում	5
ե. Նոտարիատ	6
2.2. Քրեական իրավունք և դատավարություն	6
ա. Քրեակատարողական հիմնարկներ և խափանման միջոցների կիրառում	6
3. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԸ ՀԱՅԱՍՏԱՆՈՒՄ	10
ա. Դատարանների գործունեության կազմակերպում	10
բ. Դատական ակտերի հարկադիր կատարում	11
գ. Քրեակատարողական հիմնարկներ և խափանման միջոցների կիրառում	13
4. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԻ ՀԱՄԵՄԱՏԱԿԱՆ ԱՌԱՋԱՐԿՆԵՐ	13

1. ՆԵՐԱԾՈՒԹՅՈՒՆ

Նոր կորոնավիրուսային հիվանդության (COVID-19, այսուհետ՝ վարակ) տարածումը աշխարհում ստիպել է փնտրել և ներդնել այլընտրանքային կառուցակարգեր, այնպես, որ հնարավոր լինի ապահովել մի կողմից՝ պետական մարմինների անխափան գործառնությունը, հանրային ծառայությունների մատուցումը, մյուս կողմից՝ կասեցնել հիվանդության տարածումը և ապահովել հանրային առողջությունն ու անվտանգությունը¹:

Հանրային ծառայությունների արդյունավետ մատուցումը չի կարող շրջանցել արդարադատության ոլորտը, քանի որ ժամանակակից իրավական պետությունների առանցքում մարդն է, նրա արժանապատվությունն ու իրավունքները: Պետությունը պարտավոր է երաշխավորել մարդու հիմնական իրավունքների իրականացման պատշաճ կազմակերպական կառուցակարգեր և ընթացակարգեր: Ուստի, հետազոտության մեջ ուսումնասիրվել են վարակի հատկանքները կանխելու նպատակով արդարադատության ոլորտում տարբեր երկրներում ձեռնարկված միջոցառումները, այդ թվում՝ քրեական, քաղաքացիական իրավունքի և դատավարության, էլեկտրոնային արդարադատության ոլորտներում, ինչպես նաև քրեակատարողական իրավունքում (մաս 2): Համեմատականներ անցկացնելով վարակով պայմանավորված միջոցառումների միջև Հայաստանում (մաս 3) և այլ երկրներում՝ ներկայացված են արդարադատության ոլորտում լրացուցիչ միջոցառումների առաջարկներ (մաս 4):

2. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԸ ՏԱՐԲԵՐ ԵՐԿՐՆԵՐՈՒՄ

2.1. Քաղաքացիական իրավունք և դատավարություն

ա. Դատարանների գործունեության կազմակերպում

Ֆրանսիայում դատարանները քննում են բացառապես հրատապ գործերը (օրինակ՝ դատական ակտերի հարկադիր կատարում, երեխաների իրավունքների պաշտպանություն և այլն): Մնացած գործերի քննությունը հետաձգվում կամ կասեցվում է անորոշ ժամկետով: Դատական նիստերը կարող են անցկացվել դռնփակ կամ չեղարկվել: Կողմերը կարող են կապվել դատարանին միայն գրավոր եղանակով: Վարույթի ընթացքում դատավորը կարող է օգտագործել կապի ցանկացած միջոց (ներառյալ՝ հեռախոս, էլեկտրոնային փոստ կամ նամակագրական կապ) կողմերին

¹ Օրինակ, մայիսի 11-19-ը Հայաստանում հիվանդների թիվը աճել է եռանիշ թվերով: ՀՀ ԱՆ հիվանդությունների վերահսկման և կանխարգելման ազգային կենտրոնի կայք՝ <https://bit.ly/2zfbf39> (այցելվել է 20.05.2020թ.):

տեղեկություններ փոխանցելու կամ լսելու համար: Բոլոր գործերը կարող են քննվել միանձնյա կարգով²:

Լատվիայում քաղաքացիական գործերը քննվում են գրավոր ընթացակարգով, եթե դատարանը հնարավոր է համարում նման ընթացակարգը, և եթե դա չի խախտում կողմերի իրավունքները: Գրավոր ընթացակարգը կիրառվում է, բացառությամբ այն դեպքերի, երբ առկա է բանավոր ընթացակարգով քննելու ծայրահեղ անհրաժեշտություն: Բանավոր ընթացակարգի դեպքում նախատեսվում է նաև հնարավորության դեպքում գործը հեռավար եղանակով քննելու մեխանիզմ: Մայիսի 12-ից սկսած գործերը կարող են քննվել դատական նիստերի դահլիճում՝ պահպանելով կառավարության սահմանած պահանջները³:

Լեհաստանում դատարաններին հնարավորություն է ընձեռվել միմյանց միջև բաշխել դատական գործերը: Գործի փոխանցումը կրում է ժամանակավոր բնույթ և կատարվում է հրատապ լուծում պահանջող դեպքերում⁴: Բաշխման նպատակն է կանխել վարակի տարածումը՝ դատարաններում կուտակումներից խուսափելու միջոցով: Միաժամանակ կիրառվում է դատավորներին գործուղելու հնարավորությունը այն դեպքերում, երբ այլ դատարանները ծանրաբեռնված են⁵:

Գերմանիայի դատարանների աշխատանքը ապահովում է անձնակազմի մի մասի ուժերով: Կողմերի ներկայությամբ գործերի քննությունը հետաձգվել է մինչև 6 ամսով և իրականացվում է միայն հրատապ դեպքերում: Գործերի քննությունը հետաձգելու ժամկետի սահմանումը թողնված է դատարաններին՝ կախված տարածաշրջանային առանձնահատկություններից⁶:

Վարակի տարածումը կանխելու նպատակով **Սինգապուրի** Գերագույն դատարանի ընդունած պլանի համաձայն (justice continuity plan) դատարանի կազմը բաժանվել է երկու թիմի՝ «Ա» և «Բ»: Պլանի համաձայն՝ երկու թիմերի միջև ֆիզիկական կոնտակտ չպետք է լինի: Յուրաքանչյուր գործի քննությանը միաժամանակ մասնակցում է 3 դատավոր, որոնցից 2-ը պետք է լինեն միևնույն թիմից

² European Commission Directorate- General Justice and Consumers, Comparative table on COVID-19 impact on Civil Proceedings, էջ 13-14: Սույն և հաջորդիվ ներկայացվող համեմատական աղյուսակները հասանելի են հետևյալ հղմամբ՝ <https://bit.ly/2ZcoSuK> (այցելվել է 20.05.2020թ.):

³ Նույն տեղում, էջ 19:

⁴ Նույն տեղում, էջ 26:

⁵ Նույն տեղում, էջ 27:

⁶ Norton Rose Fulbright, COVID-19 and the global approach to further court proceedings, hearings, April 2020, <https://bit.ly/2Z1jWJb> (այցելվել է 20.05.2020թ.):

և գտնվեն դատական նիստերի դահլիճում, իսկ 3-րդը՝ կապի մեջ է մտնում տեսակապով⁷:

Նիդեռլանդների դատարաններում քննվում են բացառապես հրատապ գործերը: Նման գործերի կարգավիճակ ունեն սնանկության, կասկածյալներին կալանավորելու և ընտանեկան օրենսդրության որոշակի կատեգորիայի վերաբերյալ գործերը⁸:

բ. Թվային գործիքների կիրառում

Չեխիայում դատական լսումները հետաձգելու անհնարինության դեպքում վկաներին և մեղադրյալներին հարցաքննում են տեսակապի միջոցով⁹:

Էստոնիայում դատական գործերը հնարավորության դեպքում քննում են գրավոր ընթացակարգով, իսկ բանավոր ընթացակարգի անհրաժեշտություն լինելու դեպքում հնարավորինս ձգտում են օգտվել տեսակապից¹⁰:

Ֆինլանդիայում, Հունգարիայում, Իռլանդիայում, Իտալիայում, Նիդեռլանդներում և Շվեդիայում նույնպես կիրառվում է տեսակապ կամ հեռահաղորդակցության այլ միջոցներ, ընդ որում՝ Նիդեռլանդներում դրանք զուգակցվում են քննության գրավոր ձևի հետ¹¹:

Գործերի քննության համար տեսակապ է կիրառում նաև **Մեծ Բրիտանիայի** Գերագույն դատարանը: Նիստերի ընթացքը և դատարանի որոշումների հրապարակումները հեռարձակվում են Գերագույն դատարանի պաշտոնական կայքով¹²: Քաղաքացիական գործեր քննող դատարանների նիստերը հնարավորության դեպքում իրականացվում են հեռահաղորդակցության գործիքների միջոցով (տեսակապ, հեռախոս և այլն): Առկա լսումները իրականացվում են միայն այն դեպքերում, երբ դրանց հեռավար իրականացումը անհնարին է¹³:

⁷ Նույն տեղում:

⁸ Նույն տեղում:

⁹ Digital tools in member states, էջ 1, <https://bit.ly/2ZgVH9H> (այցելվել է 20.05.2020թ.):

¹⁰ European Union Agency for fundamental rights, Coronavirus Covid-19 outbreak in the EU: Fundamental rights implications, Restrictions to public gatherings and entertainment, էջ 3, 23 March 2020, <https://bit.ly/3dAFzDT> (այցելվել է 20.05.2020թ.):

¹¹ Digital tools in member states, նշված աշխատանքը, էջ 1-2:

¹² UK Supreme Court, Arrangements during the Coronavirus (COVID-19) Pandemic, March 30, 2020, <https://bit.ly/2SX6tOA> (այցելվել է 20.05.2020թ.):

¹³ COVID-19 and the global approach to further court proceedings, hearings, նշված աշխատանքը:

Բրազիլիայի, Չինաստանի, Հնդկաստանի և Սինգապուրի Գերագույն դատարանները որդեգրել են նույն մոտեցումը¹⁴:

ԱՄՆ Գերագույն դատարանը նախկինում հետաձգված գործերի քննությունը իրականացնելու է հեռախոսային հանդիպման ձևաչափով (telephone conference)¹⁵:

Կանադայի Վերաքննիչ դատարանում մեկ դատավորի կողմից քննվող գործերով նիստերը անցկացվելու են հեռախոսային հանդիպման ձևաչափով, իսկ 3 դատավորի կազմով գործերի նիստերը՝ տեսակապով կամ հեռախոսային հանդիպման ձևաչափով¹⁶:

գ. Քաղաքացիաիրավական և դատավարական ժամկետներ

Ֆրանսիայում քաղաքացիական դատավարության շրջանակներում գործողությունների կատարման ժամկետների ընթացքը կասեցվել կամ երկարաձգվել է¹⁷: Կասեցումը կամ երկարաձգումը տևելու է մինչև արտակարգ դրության ավարտը՝ գումարած մեկ ամիս: Ժամկետների ընթացքը վերսկսվում է նշված ժամկետը լրանալուց հետո: Կոնկրետ դատավարական գործողության կատարման ժամկետի կասեցման կամ երկարաձգման ընդհանուր տևողությունը չի կարող գերազանցել 2 ամիսը: Արտակարգ դրության գործողության ընթացքում չեն գործելու նաև քաղաքացիական պայմանագրերով նախատեսված որոշ դրույթներ, օրինակ՝ պարտապանի կողմից պարտավորության չկատարման հիմքով պայմանագրային հարաբերությունների դադարեցման և սանկցիաների կիրառման դրույթները¹⁸: Օրենքով սահմանված և պայմանագրային հարաբերություններին վերաբերող որոշ դրույթների գործողությունը նույնպես կասեցված է, օրինակ՝ ծանուցման ժամկետները,

¹⁴ Richard Susskind, Covid-19 shutdown shows virtual courts work better, May 7, 2020, <https://on.ft.com/2WpITxi> (այցելվել է 20.05.2020թ.):

¹⁵ US Supreme Court, Media Advisory Regarding May Teleconference Argument Audio, April 30, 2020, <https://bit.ly/3fGxPSL> (այցելվել է 20.05.2020թ.):

¹⁶ COVID-19 and the global approach to further court proceedings, hearings, նշված աշխատանքը:

¹⁷ Pauline Kubat, Covid-19: French rules of civil procedure have been adapted, the adaptation of time limits and civil-proceedings, 1 April 2020, <https://bit.ly/3fFNCKl> (այցելվել է 20.05.2020թ.): Տե՛ս նաև Ordonnance n° 2020-306 du 25 mars 2020 relative à la prorogation des délais échus pendant la période d'urgence sanitaire et à l'adaptation des procédures pendant cette même période, (Version consolidée au 23 mai 2020), 2-րդ հոդված, <https://bit.ly/2WnwFUs> (այցելվել է 20.05.2020թ.):

¹⁸ Linklaters, Covid-19: Impact on commercial contracts- France, Paralysis of certain contractual clauses, April 9, 2020, <https://bit.ly/35MATZ8> (այցելվել է 20.05.2020թ.): Տե՛ս նաև Ֆրանսիայի կառավարության օրդոնանսի 4-րդ հոդվածը:

պայմանագրի նորոգումը և պարտավորությունների չկատարման համար սանկցիաները¹⁹:

Իտալիայում կասեցված են դատավարական և հարկադիր կատարման գործողությունների ժամկետները: Կասեցված են նաև դատական ակտերի ընդունման և դրանց հիմնավորման համար նախատեսված ժամկետները: Նշված կարգավորումները չեն գործում որոշ բացառիկ դեպքերում, օրինակ՝ դատավարական գործողությունները, որոնց չկատարումը կարող է լուրջ վնաս հասցնել դատավարության մասնակիցներին²⁰:

Իսպանիայում և **Լյուքսեմբուրգում** ընդունվել են համանման կարգավորումներ²¹:

դ. Դատական ակտերի հարկադիր կատարում

Ավստրիայում դատական ակտերի հարկադիր կատարումը իրականացվում է միայն այն դեպքում, երբ առկա է անձի կյանքին, առողջությանը, ազատությանը, անվտանգությանը սպառնացող վտանգ, կամ էական և անդառնալի վնաս կանխելու անհրաժեշտություն²²:

Խորվաթիայիում հետաձգվել են հարկադիր աճուրդները և սնանկացման գործընթացները: Մասնավորապես, 3 ամսով կասեցվել են ֆիզիկական անձանց դրամական միջոցները բռնագանձելու վարույթները, ընդ որում այս ժամկետը կարող է երկարաձգվել ևս 3 ամսով: Միաժամանակ, հարկադիր կատարման ծառայություններին առաջարկվել է հետաձգել այն հարկադիր վարույթները, որոնք ենթադրում են անշարժ գույքի ազատում և փոխանցում²³:

Լիտվայում դատական ակտերի հարկադիր կատարման ծառայությունը անցել է հեռավար աշխատանքի: Մասնավորապես, հարկադիր կատարման նոր վարույթների վերաբերյալ թերթիկները ուղարկվում են էլեկտրոնային փոստի միջոցով կամ դատական ակտերի հարկադիր կատարման ծառայության տեղեկատվական

¹⁹ Comparative table on COVID-19 impact on Civil Proceedings, նշված աշխատանքը, էջ 13:

²⁰ International union of judicial officers, Courts Tribunaux, էջ 2, <https://bit.ly/2WPflqz> (այցելվել է 20.05.2020թ.): Նշված միջոցառումները ուժի մեջ են եղել 09.03.2020 – 11.05.2020:

²¹ Նույն տեղում, էջ 4-5:

²² Comparative table on COVID-19 impact on Civil Proceedings, նշված աշխատանքը, էջ 2:

²³ Նույն տեղում, էջ 6-7:

համակարգի միջոցով²⁴: Կարանտինի ողջ ընթացքում չեն անցկացվելու հարկադիր աճուրդներ²⁵:

Ե. Նոտարիատ

Բուլղարիայում նոտարական ծառայությունները մատուցվում են միայն ծայրահեղ անհրաժեշտության դեպքում: Նախատեսվել է նոտարների հերթապահություն: յուրաքանչյուր 50.000 բնակչությանը պետք է սպասարկի առնվազն մեկ նոտար²⁶:

Մալթայում կասեցվել են նոտարների կողմից գործարքները վավերացնելու ժամկետները (օրինակ՝ կտակ): Կասեցվել են նաև նոտարների կողմից հարկային պարտավորությունների կատարման, իրավասու մարմիններին նոտարական գործունեությանը առնչվող փաստաթղթեր և տեղեկատվություն տրամադրելու ժամկետները: Կասեցումը շարունակվում է դատարանների աշխատանքի դադարեցման ամբողջ ընթացքում և շարունակվում է ևս 20 օր աշխատանքները վերսկսելուց հետո²⁷:

2.2. Քրեական իրավունք և դատավարություն

ա. Քրեակատարողական հիմնարկներ և խափանման միջոցների կիրառում

Ֆրանսիայում կասեցվել են մի քրեակատարողական հիմնարկից (այսուհետ՝ ՔՀԿ) մեկ այլ ՔՀԿ անձանց տեղափոխումները: Քրեադատավարական գործողություններին մասնակցելու համար ՔՀԿ-ներում գտնվող անձանց հետ կապը հաստատվելու է հեռահաղորդակցության միջոցների օգնությամբ, ինչի արդյունքում անհրաժեշտություն չի լինի նրանց դուրս բերել բանտից²⁸: Կասեցված են ՔՀԿ-ներում գործունեության որոշ կատեգորիաներ (սոցիալական, կրթական, սպորտային միջոցառումները, արհեստանոցներում աշխատանքը), միջին մասնագիտական կրթությանն ուղղված դասընթացները: Զբոսնել և սպորտով կարող են զբաղվել միայն սահմանափակ թվով բանտարկյալներ: ՔՀԿ-ների տարածքում գործելու են միայն առաջին անհրաժեշտության սպասարկման ծառայությունները՝ մաքրման ծառայությունը, խոհանոցը, սննդի բաշխման, առաջին բուժօգնության ծառայությունը: Կիրառված սահմանափակումների ազդեցությունը մեղմելու համար նախատեսվում է

²⁴ <http://www.antstolai.lt/> (այցելվել է 20.05.2020թ.):

²⁵ Comparative table on COVID-19 impact on Civil Proceedings, նշված աշխատանքը, էջ 21:

²⁶ Նույն տեղում, էջ 3:

²⁷ Mary Rose Micallef, COVID-19- Legal Lockdown (Part X), April 1, 2020, <https://bit.ly/35WoiTc> (այցելվել է 20.05.2020թ.):

²⁸ Europris, Prevention Measures in European Prisons against COVID-19 (France), Legal measures <https://bit.ly/2WJfNYE> (այցելվել է 20.05.2020թ.):

ՔՀԿ-ում պահվող յուրաքանչյուր անձի տալ անվճար հեռուստացույց դիտելու հնարավորություն և ամսական 40 եվրո գումար՝ հեռախոսով խոսելու համար: Ստեղծվելու է ձայնային հաղորդագրությունների ծառայություն, որի օգնությամբ դատապարտյալների հարազատները ձայնագրելու են հաղորդագրություններ: Ծառայությունը ունի մի շարք առավելություններ:

- Հնարավորություն է տալիս օգտատերերին ցանկացած պահի փոխանակել ձայնային հաղորդագրություններ: Լուծումը օգտակար է հատկապես այն դեպքերում, երբ ազատագրվածի հարազատը զբաղվածության բերումով չի կարող պատասխանել հեռախոսազանգին:
- Գերծանրաբեռնված ժամերին ազատագրված անձը ստիպված չէ սպասել հերթում, այլ կարող է ընդունել և ուղարկել հաղորդագրություններ առավել թեթև ժամերի:
- Հնարավորություն է ստեղծվում առավել ճշգրիտ պլանավորել հանդիպումների և զանգերի ժամանակացույցը:
- Առավել ճկուն շփման հնարավորություն է ընդձեռնում, քանի որ օգտատերերը կարողանում են մտքեր փոխանակել անգամ երբ իրենց ժամանակացույցները չեն համընկնում:
- Ֆինանսական առումով ավելի մատչելի է, քան բջջային կապը: Միաժամանակ, ազատագրվածի հարազատը կարող է հաղորդագրությունը ստանալուց հետո անմիջապես պատասխանել դրան՝ բջջայինով²⁹:

ՔՀԿ-ում պահվող անապահով անձանց համար նախատեսված ֆինանսական օգնության չափը կրկնապատկվել է՝ 20-ից 40 եվրո: Նախկինում օգնություն էին ստանում միայն այն անձինք, որոնց ամսական եկամուտը չէր գերազանցում 50 եվրոն: Ճգնաժամի առկայությամբ պայմանավորված՝ այժմ օգնություն ստանալու են 100 եվրոյից ցածր եկամուտ ունեցող անձինք: Այս միջոցառումը նախաձեռնելիս հաշվի է առնվել այն հանգամանքը, որ արհեստանոցներում աշխատանքը և մասնագիտական տեխնիկական-մասնագիտական կրթությանն ուղղված դասընթացները կասեցվել են, իսկ ՔՀԿ-ներում պահվող անձանց ընտանիքների համար ավելի դժվար է նյութական օգնություն ցուցաբերել³⁰:

Ավստրիայում սահմանվել է ՔՀԿ-ների անձնակազմի աշխատանքի հատուկ կարգ: Մասնավորապես, անձնակազմը պետք է աշխատի խմբերով, ընդ որում՝ նույն ընտանիքի անդամները չպետք է աշխատեն տարբեր խմբերում³¹:

Խորվաթիայի արդարադատության նախարարը առաջարկել է դատարաններին հնարավորության դեպքում հետաձգել պատիժը կրելու նպատակով

²⁹ Prison Voicemail, Frequently Asked Questions, <https://prisonvoicemail.com/faqs>:

³⁰ Prevention Measures in European Prisons against COVID-19 (France), նշված աշխատանքը, Activities/compensation:

³¹ Europris, Prevention Measures in European Prisons against COVID-19 (Austria), Staff, <https://bit.ly/3g2RXPf> (այցելվել է 20.05.2020թ.):

անձանց տեղափոխումը ՔՀԿ-ներ: Պատիժը կրելու նպատակով ՔՀԿ տեղափոխումը կարող է հետաձգվել նաև իրավախախտների դիմումների հիման վրա: Միաժամանակ առաջարկվել է բավարարել դատապարտվածների դիմումները՝ ազատագրկման ձևով պատիժը կասեցնելու (intermission) վերաբերյալ: Կրճատվել է նախնական կալանքում գտնվող անձանց թիվը, քանի որ դատարանները հնարավորինս չեն երկարաձգում ազատությունից զրկելու հետ կապված խափանման միջոցները: ՔՀԿ-ներում աշխատանքը կազմակերպվել է այնպես, որ հիմնարկի տարածքում գտնվի միայն այնքան ծառայող, որքան անհրաժեշտ է ՔՀԿ-ի նորմալ գործունեությունն իրականացնելու համար: Հնարավորության դեպքում ՔՀԿ-ի անձնակազմը բաժանվում է երկու թիմի: Թիմերի բաժանումը անհրաժեշտ է, որպեսզի անձնակազմի միջև շփումները նվազեն և վարակը չտարածվի: Անձնակազմի սպայական մասին խորհուրդ է տրվում հնարավորության դեպքում արձակուրդ մեկնել և մնալ տանը: ՔՀԿ-ների վարչություններին հանձնարարվել է համագործակցել ճգնաժամի ամբողջ ընթացքում: Համագործակցության շրջանակներում ՔՀԿ-ները անհրաժեշտության դեպքում փոխանակելու են սարքավորումներ, պաշտպանիչ միջոցներ և այլն³²:

Ֆինլանդիայում սկզբնապես Արդարադատության նախարարության որոշմամբ հետաձգվեց պատժի կրման նպատակով այն անձանց տեղափոխման գործընթացը, որոնց ազատագրկման ժամկետը առավելագույնը 6 ամիս էր: Որոշումը տարածվում է նաև վարչական իրավախախտումներով սահմանված տուգանքների չվճարման համար ազատագրկման կիրառման գործընթացների վրա՝ 2020թ. մարտի 19-ից հունիսի 19-ը ընկած ժամանակահատվածի համար: Միջոցառումը իրականացվել է ՔՀԿ-ներում կարճաժամկետ դատապարտվածների թիվը նվազեցնելու և վարակի տարածումը կանխելու համար: 2020 թվականի ապրիլի 7-ին, սակայն, Ֆինլանդիայի խորհրդարանն ընդունել է օրենք, որով հետաձգվում է դատապարտված անձանց տեղափոխումը ՔՀԿ՝ ապրիլի 10-ից հուլիսի 31-ը ընկած ժամանակահատվածում³³: Դրանով ուժը կորցրեց նախարարի՝ վերը նշված որոշումը: Ի տարբերություն արդարադատության նախարարության կայացրած որոշման՝ այս օրենքը տարածվում է բոլոր դատապարտվածների վրա՝ անկախ ազատագրկման տևողությունից, ինչպես նաև վարչական իրավախախտումներով սահմանված տուգանքների չվճարման համար ազատագրկման կիրառման գործընթացների վրա³⁴: Օրենքը, սակայն, չի տարածվում նախնական կալանքի տակ գտնվող այն անձանց վրա, որոնց նկատմամբ կայացվել է ազատագրկման վերաբերյալ դատավճիռ:

³² Euopris, Prevention Measures in European Prisons against COVID-19 (Croatia), Staff, <https://bit.ly/36gdDD8> (այցելվել է 20.05.2020թ.):

³³ Օրենքով չեղարկվել է նախարարության կայացրած որոշումը:

³⁴ Euopris, Prevention Measures in European Prisons against COVID-19 (Finland), Legal measures, <https://bit.ly/3g4kuE8> (այցելվել է 20.05.2020թ.):

Իտալիայում մինչև հունիսի 30-ը դատապարտյալները հնարավորություն ունեն իրենց դիմումի հիման վրա պատժի կրումը շարունակել տանը, հանրային կամ մասնավոր բժշկական կենտրոնում: Դիմումը բավարարելու նախապայմանը այն է, որ ազատագրված տնտեսությունը չպետք է գերազանցի 18 ամիսը: Տեղափոխման համար կարող են դիմել նաև այն անձինք, որոնց սկզբնական ազատագրված ժամկետից մնացել է 18 ամիս: Այս հնարավորությունից չեն կարող օգտվել նրանք, ովքեր դատապարտվել են մաֆիայի կազմում կատարած հանցագործությունների, ահաբեկչության, փրկագին ստանալու նպատակով առևանգման, թմրամիջոցների միջազգային թրաֆիքինգի, ընտանեկան բռնության և ոտնձգությունների համար, ինչպես նաև կրկնահանցագործները և վերջին շրջանի բանտային ապստամբությունների մասնակիցները³⁵:

Իրանում վարակի տարածումը կանխելու նպատակով ժամանակավորապես ազատ է արձակվել 85.000 բանտարկյալ³⁶:

ԱՄՆ-ում ազատ է արձակվել ավելի քան 16.000 կալանավոր, որոնց մեծ մասը համարվում է վտանգ չներկայացնող կամ մեղադրվում է հասարակական մեծ վտանգավորություն չներկայացնող հանցագործությունների մեջ³⁷:

Ֆրանսիայում ավելի քան 11.000 անձ ազատ է արձակվել, չնայած դրա արդյունքում աճել են կրկնահանցագործությունները: Ազատ արձակվածների թվում են թե՛ կալանավորվածները, թե՛ այն դատապարտյալները, որոնց ազատագրված ժամկետին մնում էր 3 ամիս³⁸:

Գերմանիայի Հյուսիսային Հռենոս-Վեստֆալիա երկրամասում ազատ է արձակվել 1.000 բանտարկյալ³⁹:

Այս համատեքստում անհրաժեշտ է նշել, որ Եվրոպայի խորհրդի Խոշտանգումների և անմարդկային կամ նվաստացնող վերաբերմունքի կամ պատժի կանխարգելման եվրոպական հանձնաժողովը հրապարակել է վարակի ընթացքում

³⁵ Europris, Prevention Measures in European Prisons against COVID-19 (Italy), General prevention measures, <https://bit.ly/2Tkbn8n> (այցելվել է 20.05.2020թ.):

³⁶ Parisa Hafezi, Iran temporarily frees 85.000 from jail including political prisoners, March 17, 2020, <https://reut.rs/3boiyT8> (այցելվել է 20.05.2020թ.):

³⁷ Nick Givas, over 16k US inmates have been released as coronavirus crisis has progressed, April 16, 2020, <https://fxn.ws/3clBKMY> (այցելվել է 20.05.2020թ.):

³⁸ Monique El-Faizy, Challenged abound for released early from French prisons due to Covid-19, 05/05/2020, <https://bit.ly/3cKYRqk> (այցելվել է 20.05.2020թ.):

³⁹ John Cody, Thousands of prisoners and detained migrants released early across Europe due to coronavirus, April 13, 2020, <https://bit.ly/2YRWfTp> (այցելվել է 20.05.2020թ.):

ազատությունից զրկված անձանց նկատմամբ վերաբերմունքի սկզբունքներ⁴⁰: Փաստաթղթի 5-րդ սկզբունքը սահմանում է, որ իրավասու մարմինները հնարավորինս պետք է խուսափեն ազատության սահմանափակում ենթադրող միջոցառումների օգտագործումից և կիրառեն այլընտրանքային միջոցներ: Խոսքը, մասնավորապես, վերաբերում է նախնական կալանքին:

3. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԸ ՀԱՅԱՍՏԱՆՈՒՄ

Արդարադատության ոլորտի վրա համաճարակի ազդեցությունը մեղմելու և պետական մարմինների բնականոն աշխատանքը ապահովելու նպատակով Հայաստանում նույնպես ձեռնարկվել են մի շարք միջոցառումներ: Արտակարգ դրությամբ պայմանավորված փոփոխություններ են իրականացվել ՔԿՀ-ների, դատական ակտերի հարկադիր կատարման ծառայության և դատական համակարգի աշխատանքային ռեժիմում:

Ուսումնասիրության առարկա ոլորտներում Հայաստանի Հանրապետությունում ձեռնարկված միջոցառումները առաջին հերթին տեղ են գտել «Հայաստանի Հանրապետությունում արտակարգ դրություն հայտարարելու մասին» 2020 թվականի մարտի 16-ի N 298-Ն որոշման մեջ⁴¹ և դրա հետագա փոփոխություններում:

ա. Դատարանների գործունեության կազմակերպում

Համաճարակի պայմաններում դատական համակարգի բնականոն աշխատանքը ապահովելու նպատակով ՀՀ բարձրագույն դատական խորհուրդը 2020 թվականի մարտի 24-ին կայացրել է «Պարետի 2020 թվականի մարտի 24-ի «Հայաստանի Հանրապետության ողջ տարածքում հանրային ծառայության իրականացման նկատմամբ կիրառվող սահմանափակումների վերաբերյալ» թիվ 15 որոշման կատարումն ապահովող միջոցառումների մասին» ԲԴԽ-12-Ո-25 որոշումը⁴²:

⁴⁰ Statement of principles relating to the treatment of persons deprived of their liberty in the context of the coronavirus disease (COVID-19) pandemic European Committee for the Prevention of Torture and Inhuman or Degrading Treatment or Punishment (CPT), issued on 20 March 2020, CPT/Inf(2020)13, <https://rm.coe.int/16809cfa4b>:

⁴¹ Ընդունվել է ՀՀ կառավարության կողմից 2020 թվականի մարտի 16-ին, ՀՀՊՏ, 2020.03.16/ Հատուկ թողարկում 257.5, 298-Ն: Սույն ուսումնասիրության մեջ ներկայացվում է կառավարության 2020 թվականի մայիսի 14-ի 729-Ն որոշմամբ կատարված փոփոխություններով տարբերակը, <http://www.irtek.am/views/act.aspx?aid=152485>:

⁴² Ընդունվել է ՀՀ բարձրագույն դատական խորհրդի կողմից 2020 թվականի մարտի 24-ին, ԲԴԽ-12-Ո-25, <https://www.irtek.am/views/act.aspx?aid=104450>:

Որոշմամբ նախատեսվում է.

- Դատական նիստերի հեռավար/առցանց իրականացում, եթե առկա է դատավարության մասնակիցների համաձայնությունը:
- Դատարանների աշխատանքը պետք է ապահովվի աշխատակիցների հնարավոր նվազագույն թվաքանակով:
- Դատարանների գրասենյակներում կազմակերպել հերթապահություն՝ նվազագույնի հասցնելով հերթապահ աշխատակիցների քանակը:
- Դատական կարգադրիչների ծառայության միջոցով արգելել դատարանների վարչական շենքեր մուտք գործել բոլոր այն անձանց, ովքեր չեն հանդիսանում տվյալ օրը կոնկրետ դատարանում նախապես նշանակված դատական նիստերով դատավարության մասնակիցներ (ներկայացուցիչներ):
- Բարձրագույն դատական խորհրդին, դատարաններին, դատավորների ընդհանուր ժողովին և Դատական դեպարտամենտին հասցեագրված ցանկացած փաստաթուղթ ընդունվելու է էլեկտրոնային եղանակով⁴³:
- Դատարանների վարույթում գտնվող գործերի նյութերին ծանոթանալու իրավունքի իրականացումն ապահովել բոլոր հասանելի էլեկտրոնային հավելվածների կիրառման միջոցով:
- Դատավորներին առաջարկել ընդունել էլեկտրոնային եղանակով ստացված փաստաթղթերը՝ հետագայում, ըստ անհրաժեշտության, դրանց բնօրինակները պահանջելու պայմանով:
- Առաջարկել դատավորներին և դատավարության մասնակիցներին, նախապես համաձայնեցնելով, հետաձգել բոլոր դատական նիստերը՝ բացառությամբ անհապաղ քննության ենթակա գործերի:

բ. Դատական ակտերի հարկադիր կատարում

2020 թվականի մարտի 16-ի N 298-Ն որոշման 15.1 կետով սահմանափակվել է տեղական ինքնակառավարման մարմինների կողմից՝ վարչական իրավախախտումների վերաբերյալ օրենսգրքի 124⁷-րդ հոդվածի (համայնքներում վճարովի ավտոկայանատեղերի համար օրենքով սահմանված տեղական տուրքը չվճարելը) հիմքով կայացված վարչական ակտերի, ինչպես նաև ոստիկանության «Ճանապարհային ոստիկանություն» ծառայության կողմից կայացված վարչական ակտերի հիման վրա «Վարչարարության հիմունքների և վարչական վարույթի մասին»

⁴³ Էլեկտրոնային փոստի հասցեները՝ <http://court.am/hy/news/267> (այցելվել է 20.05.2020թ.):

Հայաստանի Հանրապետության օրենքի 88-րդ հոդվածի 4-րդ մասի (դրամական պահանջների կատարման կարգ) պահանջների պահպանմամբ ներկայացված դիմումով 2020 թվականի ապրիլի 14-ից հետո հարուցված կատարողական վարույթներով պարտապանի գույքի վրա արգելանք դնելու լիազորությունը: Արգելանքները ենթակա են կիրառման արտակարգ դրությունը դադարեցնելուց հետո:

Նույն կետով սահմանափակվել է նաև կառավարության կողմից սահմանված՝ վարակի հետևանքների չեզոքացման միջոցառումների շրջանակներում 2020 թվականի մարտի 16-ից հետո ֆիզիկական և իրավաբանական անձանց որպես աջակցություն տրամադրված դրամական միջոցների վրա արգելանք դնելու և բռնագանձում կատարելու լիազորությունը:

Պարետի 2020 թվական մայիսի 3-ի «Հայաստանի Հանրապետության ողջ տարածքում կիրառվող ժամանակավոր սահմանափակումների վերաբերյալ» N 63 որոշման 2-րդ հավելվածով սահմանվել են նաև պետական կառավարման և տեղական ինքնակառավարման մարմիններում աշխատանքի կազմակերպման կանոններ⁴⁴: Ընդհանուր կանոնների համաձայն՝ պետական կառավարման և տեղական ինքնակառավարման բոլոր մարմինների գործունեությունը հնարավոր բոլոր դեպքերում իրականացվում է հեռավար/առցանց եղանակով՝ միաժամանակ ապահովելով մարմնի գործառույթների անխափան իրականացումը: Առցանց ծառայությունների առկայության դեպքում նշված մարմինները միջոցներ են ձեռնարկում դրանք հնարավորինս էլեկտրոնային եղանակով մատուցելու համար: Զուգահեռաբար ծառայությունների առցանց մատուցման վերաբերյալ պետք է իրականացվեն հանրային իրազեկման արշավներ: Քաղաքացիների սպասարկման կանոնների համաձայն՝ սպասարկման գրասենյակներում պետք է ապահովվի անձնակազմի հնարավոր նվազագույն ներգրավվածություն և շփում քաղաքացիների հետ: Հնարավորության դեպքում անհրաժեշտ է ապահովել քաղաքացիների ընդունելություն՝ ըստ նախնական էլեկտրոնային կամ հեռախոսային հերթագրման, կենսաթոշակային տարիքի անձանց պետք է սպասարկել առանձին՝ բացառելով շփումը այլ անձանց հետ: Սպասարկման գրասենյակներում անհրաժեշտ է բացառել մարդկանց կուտակումները: Եթե կա կուտակումների առաջացման վտանգ, ապա պետք է ապահովել մարդկանց մուտքի գործընթացի կառավարմանն ուղղված միջոցառումներ: Մասնավորապես նախատեսվում է սահմանափակել մարդկանց մուտքը փակ տարածք՝ մինչև ներսում գտնվող մարդկանց որոշակի քանակի դուրս գալը: Հերթերը բացառելու և սոցիալական հեռավորությունն ապահովելու նպատակով

⁴⁴ Ընդունվել է ՀՀ պարետի կողմից, 2020 թվականի մայիսի 3-ին, Հատուկ թողարկում, N 63
<https://www.arlis.am/DocumentView.aspx?docid=142472>:

վճարման տերմինալների, սպասարկման տաղավարների մոտ առնվազն իրարից մեկ մետր հեռավորությամբ անհրաժեշտ է իրականացնել գծանշում:

գ. Քրեակատարողական հիմնարկներ և խափանման միջոցների կիրառում

«Հայաստանի Հանրապետությունում արտակարգ դրություն հայտարարելու մասին» 2020 թվականի մարտի 16-ի N 298-Ն որոշման 11-րդ և 12-րդ կետերով նախատեսված են քրեակատարողական հիմնարկներում և ձերբակալվածներին պահելու վայրերում գործող հատուկ կանոնները: Մասնավորապես, սահմանվել է, որ թույլատրվում է շաբաթական մեկ անգամ մեկ հանձնուքի, ծանրոցի կամ փաթեթի ստանալը կամ ուղարկելը: Սահմանվել է, որ անձին հանձնուք, ծանրոց կամ փաթեթ ուղարկելու կամ տանալու նպատակով ՔՀԿ կամ ձերբակալվածներին պահելու վայրի տարածք կարող է մուտք գործել միայն մեկ անձ: Միաժամանակ արգելվել են տեսակցությունները՝ բացառությամբ տեսազանգից օգտվելու դեպքերի: Նախատեսվել է նաև, որ ՔՀԿ-ի առաջարկությամբ և պարետի որոշմամբ կարող են սահմանափակվել կամ արգելվել՝ զբոսանքները, քրեակատարողական հիմնարկի տարածքի սահմաններում և դրանից դուրս գտնվելը (այդ թվում՝ կարճաժամկետ մեկնելը), տարածքի սահմաններում տեղաշարժվելը: Սահմանափակումների ցանկը սպառիչ չէ, և պարետի որոշմամբ կարող են սահմանվել լրացուցիչ սահմանափակումներ:

4. ՆՈՐ ԿՈՐՈՆԱՎԻՐՈՒՍՈՎ ՊԱՅՄԱՆԱՎՈՐՎԱԾ ՄԻՋՈՑԱՌՈՒՄՆԵՐԻ ՀԱՄԵՄԱՏԱԿԱՆ ԱՌԱՋԱՐԿՆԵՐ

Արդարադատության ոլորտում վարակի տարածման հետևանքով այլ երկրներում ձեռնարկված միջոցառումների համեմատական ուսումնասիրության արդյունքներով հնարավոր է վեր հանել մի շարք այլ միջոցառումներ, որոնց իրականացումն ավելի կնպաստի Հայաստանում ոլորտի առջև ծառացած խնդիրների հաղթահարմանը: Այսպես.

- Հնարավոր է դիտարկել որոշ կատեգորիայի գործերի քննության անցկացումը բացառապես գրավոր ընթացակարգով: Օրինակ՝ հայցագնով պայմանավորված մանր քաղաքացիական գործերը:
- Դատարանների միջև գործերի վերաբաշխման հնարավորություն ընձեռնել՝ ծանրաբեռնվածության նվազեցման նպատակով: Վերաբաշխման միջոցով հնարավոր կլինի գործերի որոշ մասը ծանրաբեռնված դատարաններից

փոխանցել առավել թեթև ռեժիմով աշխատող դատարաններ: Նույն նպատակին կարելի է հասնել նաև դատավորների գործուղելու միջոցով:

- Քննարկման առարկա է արտակարգ դրության ողջ ընթացքում դատական ակտերի հարկադիր կատարման բոլոր վարույթների հիմնական մասի կասեցումը: Որպես բացառություն կարելի է սահմանել այն դեպքերը, երբ առկա է անձի կյանքին, առողջությանը, ազատությանը, անվտանգությանը սպառնացող վտանգ կամ էական և անդառնալի վնաս կանխելու անհրաժեշտություն: Առաջարկվում է նաև արտակարգ դրության ընթացքում չանցկացնել հարկադիր աճուրդներ:
- «Դատական ակտերի հարկադիր կատարման մասին» ՀՀ օրենքի 24-րդ հոդվածի համաձայն՝ քաղաքացի-պահանջատիրոջ կողմից կատարողական թերթը կատարման ներկայացնելու ժամկետը հարգելի ճանաչված պատճառներով բաց թողնելու դեպքում դատարանը կարող է այն վերականգնել: Եթե ժամկետի ուշացումը տեղի է ունեցել արտակարգ դրության հիմքով հայտարարված սահմանափակումների պատճառով, անհրաժեշտ է նախատեսել մեխանիզմ, որը հնարավորություն կտա վերականգնել բաց թողնված ժամկետները առանց դատարան դիմելու՝ ավելի պարզեցված կարգով, ինչը թույլ կտա չծանրաբեռնել դատարաններին:
- ՀՀ կառավարության 2006 թվականի օգոստոսի 3-ի «Հայաստանի Հանրապետության Արդարադատության նախարարության քրեակատարողական ծառայության՝ կալանավորվածներին պահելու վայրերի և ուղղիչ հիմնարկների ներքին կանոնակարգը հաստատելու մասին» N 1543-Ն որոշման 182-րդ կետի համաձայն⁴⁵՝ կալանավորված անձը կամ դատապարտյալը յուրաքանչյուր դեպքում կարող է օգտվել հեռախոսակապից առավելագույնը 15 րոպե: Հաշվի առնելով այն հանգամանքը, որ տեսակցությունները արգելված են, առաջարկվում է ավելացնել թույլատրված հեռախոսային խոսակցությունների ժամանակը, ինչպես նաև ընդլայնել դատապարտյալների զբաղմունքն ապահովելու, սոցիալականացման և ընտանիքի անդամների հետ կապի հնարավորություն տվող այլընտրանքային կառուցակարգերը (ձայնային հաղորդագրություններ, հեռուստացույց դիտելու հնարավորություն և այլն):

⁴⁵ Ընդունվել է ՀՀ կառավարության կողմից 2006 թվականի հունիսի 3-ին, ՀՀՊՏ, 2006.11.22/60(515), հոդ.1217, N 1543-Ն, <https://www.arlis.am/DocumentView.aspx?docid=140547>:

- Ոչ մեծ ծանրության հանցագործություններ կատարած անձանց տեղափոխումը ՔՀԿ-ներ կարող է հետաձգվել մինչև արտակարգ դրության ավարտը: Միաժամանակ, ոչ մեծ ծանրության հանցագործությունների համար դատապարտված այն անձինք, ովքեր մինչև արտակարգ դրություն հայտարարելը արդեն իսկ տեղափոխվել էին ՔՀԿ, կարող են պատժի մնացածը մասը կրել տնային պայմաններում: Նպատակահարմար կարող է լինել նաև պատժի կրման ավարտից շուտ ազատ արձակել նաև այն անձանց, որոնց ազատագրկման ժամկետը գրեթե լրացել է: Որպես շեմ կարող են ընդունվել այն դեպքերը, երբ պատժի կրմանը մնացել է, օրինակ՝ 3-4 ամիս: Նպատակահարմար է նաև դիտարկել ազատագրկման հետ կապված խափանման միջոցների վերանայման հարցը՝ կիրառելով այլընտրանքային միջոցներ:
- Իրավասու մարմինները հնարավորինս պետք է խուսափեն ազատության սահմանափակում ենթադրող խափանման միջոցի կիրառումից և սահմանափակվեն խափանման այլընտրանքային միջոցներով: Պետք է նաև հնարավորինս կրճատել նախնական կալանքում գտնվող անձանց թիվը՝ չերկարաձգելով ազատությունից զրկելու հետ կապված խափանման միջոցները:

Վերլուծությունը պատրաստվել է «Լոյս» հիմնադրամի իրավական ուղղության վերլուծաբան Համլետ Ավետիսյանի կողմից

«ԼՈՒՅՍ հիմնադրամ» գրառմամբ հրապարակված նյութը պաշտպանված է ՀՀ օրենսդրությամբ և միջազգային համաձայնագրերով: Հրապարակված նյութի բոլոր իրավունքների բացառիկ իրավատերը **«ԼՈՒՅՍ»** հիմնադրամն է:

Նյութի ամբողջական կամ դրանից քաղվածքների վերարտադրումը թույլատրվում է իրականացնել միայն **«ԼՈՒՅՍ հիմնադրամ»** գրառման և համապատասխան **ակտիվ հղման** տեղադրման պայմանով՝ պահպանելով «ԼՈՒՅՍ» հիմնադրամին պատկանող նյութերի օգտագործման կարգը: